

## 15.2 RAPPORT 2: DIAKONALE SAKE – BESTUUR VAN KINDERHUISE EN BETROKKENHEID BY GLENZICHT AFTREE-OORD

### 1. Sake waarvan die Sinode kennis neem

#### 1.1 *Kinderhuise*

- 1.1.1 Die SDDS is 'n Artikel 21 maatskappy. Dit impliseer dat die Deputate wat deur die Sinode aangewys is, ook direkteur is en wat onder andere verantwoordelik is vir beheer en toesig en raad aan die kinderhuishuisbesture.
- 1.1.2 Die SDDS vergader gereeld. Op die vergaderings word daar deur elke kinderhuis verslag gedoen van die finansies, personeel, dag tot dag versorging van die kinders, behoeftes op materiële gebied, wat insluit fisiese fasiliteite en ander finansiële nood.
- 1.1.3 Die SDDS koördineer, fasiliteer en reguleer die verspreiding van die finansies wat die kerke bydra met volle insae en samewerking van die twee kinderhuise.
- 1.1.4 Wat die dag tot dag versorging en bestuur van die kinderhuise aanbetref is dit die verantwoordelikheid van die onderskeie kinderhuisbestuurders in samewerking met die onderskeie besture. Wat die skakeling met die onderskeie provinsiale owerhede aangaan, is dit ook die verantwoordelikheid van die onderskeie bestuurders. Enige hulp wat die tehuse egter mag vra, word deur die SDDS voorsien. Die kinderhuise behoort ook aan die SDDS art 21 maatskappy.
- 1.1.5 Die geestelike versorging kry baie aandag. Die kinders word in die plaaslike Gereformeerde Kerke gekatriseer, terwyl die plaaslike predikante waar die kinderhuise geleë is, die geestelike versorging van die kinders waarneem. Daar word ook soos in 'n normale Gereformeerde huisgesin huisgodsdienst gehou en kinders het ook geleentheid vir persoonlike stiltetyd.
- 1.1.6 Daar word baie moeite gedoen om die kinderhuise se nood en behoeftes onder die aandag van diakonieë te bring. Alle belangstellendes word ook uitgenooi om betrokke te raak en gevolglik is daar verskeie diakonieë wat aktief by die kinderhuise betrokke is.

#### 1.2 *Glenzicht Aftree-oord*

- 1.2.1 Probleme word ook ondervind met gelewerde munisipale rekeninge van die aftree-oord. Oor hierdie saak sal in die Aanvullende Agenda verder gerapporteer word.
- 1.2.2 'n Versorgingseenheid waarvoor die infrastruktuur daargestel is, is wel vir 'n tyd by die oord bedryf. Die diens is gestaak nadat die verskaffer nie die mas kon opkom nie. Die bestuurskomitee van Glenzicht is weer besig om ondersoek te doen of dit wel moontlik is om 'n versorgingsoord by Glenzicht ekonomies te bedryf. Daar sal in die Aanvullende Rapport verder oor die aangeleentheid verslag gedoen word. Die Stadsraad van Johannesburg ondervind vir 'n geruime tyd probleme om korrekte rekeninge vir dienste gelewer, te verskaf. Baie werk is gedoen om die probleem op te los.

#### 1.3 *Versorging van afgetrede werknemers van SDDS en die Kinderhuise*

- 1.3.1 Die Deputate het die volgende opdrag van Sinode 2009 ontvang:
  - (i) Dat goedkeuring verleen word dat 'n fonds vir die begin van R200 000 in die lewe geroep word met die doel dat voormalige werknemers in die daaglikse versorging bygestaan word.
  - (ii) Dat die te benoemde Deputate hierdie aangeleentheid as 'n saak van prioriteit ondersoek en dadelik maatreëls in plek stel dat die aangeleentheid met waardigheid afgehandel kan word (Acta 2009:141, 2.3).

- 1.3.2 Die Deputate het 'n fonds, die “Mediese Bystandsfonds” (omdat mediese uitgawes die grootste verpligting in pensioenarisse se begroting is) daargestel met die doel om bystand te verleen aan: “Werknemers van die kinderskole voor 2000 wat die broodwinner van die huisgesin was en hulle afhanklikes, en na aftrede 'n maandelikse pensioen ontvang, is die verantwoordelikheid van die kinderskool waar hulle gewerk het na analogie van KO, artt 11, 13 en 20 en dan met tussenkoms van die plaaslike diakonie waar hulle woonagtig is.”
- 1.3.3 Die fonds is begin en kon meesal elke jaar op jaareinde aangevul word. Gedurende die 2013/2014 finansiële jaar is die fonds weer aangevul sodat die fonds met 'n opgelope surplus van R963 000 kon afsluit.

## **2. Sake waaroor die Sinode besluit**

### Aanbevelings

- 2.1 Dat die Sinode kennis neem van hierdie Rapport.
- 2.2 'n Woord van dank word gerig aan brs CJH Kruger en HSJ Vorster vir die harde werk, tyd en baie moeite aan Glensig Aftree-oord bestee.

*Rapporteur:*